

17. februar 2016

UPA 2015/29

Inatsisartut suleriaasianni § 36 naapertorlugu apeqquteqaat aallavigalugu Inatsisartut oqallinisaannik siunnerssuut imaattoq matumuuna saqqummiuppara:

Apeqquteqaat aallaavigalugu oqallinnissamik siunnerssuut: Boligstøtte aqqutigalugu illuutillit Inissialiornermut tapersiissuteqartarneq pillugu peqqussutaani kapitali 4 naapertorlugu illusinikut illuutaannut pituttorlugit najugaqartussaannerat qanoq iliorluta qasukkarsinnaavarput.

(Inatsisartunut ilaasortaq Anders Olsen, Siumut)

Tunngavilersuut:

Politikikkut sulissutigisatta ilagaat nunatsinni nuttarsinnaanerup annertusarnissaa Nunatsinni innuttaasut ineqarniarnikkut pitsaasumik atugassaqaarnissaat periarfissaqartuarnissaallu qinikkatut pingaartillugu oqariartuutiguarsimavarput. Tamanna aamma pisortat aqqutigalugit illumik taarsigassarsimasut pillugit malittarisassaannik pitsanngorsaannissaq eqaallisaanissarlu pisariaqarpoq.

Namminerisamik illuuteqalernissaq innuttaasunut amerlanerpaanut periarfissaajuarluni pinissaa anguniarneqartuartaqartoq isumaqarpunga, pisortallu ukiuni amerlasuuni sulit illuliornermut arlaatigut aallartisaasuunissat pisariaqartussaavoq.

Namminerisamik illusit amerlanerit siunissami toqqissillutik utoqqalisarfissatut angerlarsimaffissamik pilersitsinissaq siunertarisarpaat. Taamaattumik pinngitsoorsinnaangilarput Inissialiornermut tapersiissuteqartarneq aqqutigalugu innuttarpasuit illutaarnissaminnut periarfissaqarsimanerat – tamanna pisinnaasimassanngikkaluarpoq taama aqqissuussisoqarsimangikkaluarpat.

Ukiuni makkunani innuttaasut nunami najukkaminni inuuniarnikkut suliffissaqarniarnikkullu atugaat peqqutaalluinnarlutik illoqarfimmut nunaqarfimmulluunniit allamut nuuttariaqartarnerannik kinguneqartarpoq, ilaatigut illuutilippasuit illugisartik annaasariaqartarlugu.

Boligstøtsi aqqutigalugu illuutit attartortissinnaaneranut malittarisassat Inissialiornermut tapersiissuteqartarneq pillugu inatsisartut peqqussutaani kapitali 4 naapertorlugu taarsigassarsilluni illugineqartut attartortinneqartarnissaat pillugu Namminersornerullutik Oqartussat nalunaarutaat nr. 13, 22. marts 1994-imeersoq-mi nassaassaapput. Taamaattumik malittarisassat pisoqaapput ullutsinni suliffisaqarneq pillugu nuttartaqartarnermut tunngatillugu tulluarunnaavissimasut

Inissialiornermut tapersiissuteqartarneq pillugu nalunaarut manna atuuttoq eqqarsaatigalugu assersuutigalugu ilinniariernerup nalaani nunagisap qimasimanerani illu taarsigassarsiarisat attartortinneqarsinnaavoq. Ilinniarnerulli naammassineratigut periarfissaq tamanna atorunnaartussaalluni.

Inuttut nunagisamullu nalilittut ineriartornissaq kialluunniit kissaatigiuartarpaa, tamannalu aamma inuussutissarsiorneq suliffeqarnerlu aqputigalugit kiffaangissuseqarluni sumiiffik apeqqutaatinagu periarfissaqartuarnissaq qinikkatut soqutigisariaqarparput. Allatut oqaatigalugu: Illoqarfimmut nunaqarfimmulluunniit allamut kinaluunniit nuussinnaasariaqarpoq suliffittaarneq inuussutissarsiorfittaarnerluunniit pissutaallutik, illu pigisaq annaangikkaluarlugu.

Periarfissaq tamanna ajoraluartumik nalunaarummi pisoqalisumi pisinnaangilaq!

Neriuppunga oqallisissiaq manna partiinit Naalakkersuisunillu tigulluarneqarluni inerititaqarusuttumik oqalliseqataaffiujumaartoq, innuttaasummi kikkulluunniit inuiaqatigiinni kiffartuussinisaat aporfilersortariaqanngilarput illugisaat inigisaalluunniit pilliutigisussanngorlugit. Tamanna aaqqinneqartariaqarpoq.

Inatsisartut oqaaseqaatissaattut siunnersuut:

Inatsisartut Naalakkersuisunut kaammattuutigaat Inissialiornermut tapersiissuteqartarneq pillugu inatsisartut peqqussutaani kapitali 4 naapertorlugu taarsigassarsilluni illugineqartut attartortinneqartarnissaat pillugu Namminersornerullutik Oqartussat nalunaarutaat nr. 13, 22. marts 1994-imeersoq nutaamik sukumiisumillu allannguuteqartitsinissaq siunertaralugu nalilersussagaat. Pisariaqarpallu peqqussummut allannguuteqartitsillutik, taamaalilluni nunatsinni nuttarsinnaneq annertusarlugu illuutilinnut, sulisitsisunut inuiaqaigiinnullu iluaqutaasumik.